

乙巳年菊月十八日 本壇主筆司大魁夫子降 詩
拜斗九天立大功 燈光普照遍南宮
消災賜福澤萬民 諸子虔誠志睦融

論戒殺

俗云：「常聞世人有言：心好，強如喫齋，其語如乎！」。

請師決之，師曰：「仁德君子，慈心善人，利生濟物，積德累功，至於動用之間，任運作為之所。見一切生靈，投於死地，便無不惻隱。救於生處，如斯慈悲，方謂好心。」。

無故殺彼，充己口腹。或持利刀剖腹，拈尖刀刺心，剝皮刮鱗，斷喉劈殼，活烹生煎，鑊煮爐炙，百般造作，美口快肚，慈憫之心全無，好心卻在何處？反說昧心之言，其過如何能懺？

愚有苦口，公須諦聽。果爾一生戒殺，終生茹素不退，縱心不好，墜在異生，也不落屠人之手，鑊湯爐火之中耳！